

MMA sasar kumpul RM500,000 menerusi Sepeda Amal Borneo tahun ini

- 2024-04-07T18:17:46+08:00



KUCHING: Persatuan Perubatan Malaysia (MMA) menyasarkan untuk mengumpul RM500,000 menerusi Sepeda Amal Borneo edisi tahun ini.

ADVERTISEMENT

MMA dalam kenyataan hari ini memaklumkan program tahun ini akan menyaksikan 20 penunggang basikal menempuh perjalanan lebih 800 kilometer (km) dari Miri ke Kuching dari 28 Julai hingga 3 Ogos.

Menurut persatuan itu, dana yang diraih melalui sumbangan dalam talian akan digunakan untuk program kesedaran dan saringan serviks yang dijalankan di bawah Program ROSE (Removing Obstacles to cervical Screening) di Kapit, Miri, Bintulu, Kuching dan Puncak Borneo.

"Saringan telah dimulakan awal Mac tahun ini dalam kalangan komuniti kurang bernasib baik di Kapit, manakala lebih banyak saringan dirancang diadakan beberapa bulan menjelang acara berbasikal itu.

ADVERTISEMENT

"Kanser serviks (pangkal rahim) ialah kanser ketiga paling lazim dalam kalangan wanita di Malaysia, dengan kejadian tertinggi dicatat di Sarawak," menurut kenyataan itu.

Sementara itu, Presiden MMA Dr Azizan Abdul Aziz berkata kesedaran mengenai kanser serviks dapat menyelamatkan nyawa kerana ia boleh dicegah dan dirawat dengan efektif sekiranya dikesan lebih awal.

"Bersama-sama dengan Yayasan ROSE, kami menumpukan usaha di Sarawak kali ini kerana ia negeri yang mempunyai kes kanser serviks tertinggi iaitu 9.6 kes bagi setiap 100,000 wanita, menurut Laporan Pendaftaran Kanser Nasional Malaysia. Kadar ini membimbangkan, justeru lebih banyak usaha diperlukan untuk meningkatkan kesedaran dan saringan HPV di negeri ini," katanya.

Menurut Yayasan ROSE, sebanyak 1,067 wanita disaring di 33 lokasi di Sarawak pada Jun dan Julai 2023 dalam acara Sepeda Amal Borneo tahun lepas. Sehingga kini, Program ROSE telah menyaring lebih 27,000 wanita di seluruh Malaysia.

Orang ramai yang ingin menyumbang sila layari <https://mma.org.my> untuk butiran lanjut. -- BERNAMA

ADVERTISEMENT